

Odluka kojom se donosi Odluka o produženju mandata Državne komisije za reviziju odluka o naturalizaciji stranih državljana

Koristeći se ovlaštenjima koja su visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora”;

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XI.2) “mjere kojima se obezbjeđuje implementacija Mirovnog sporazuma na cijeloj teritoriji Bosne i Hercegovine i njenih entiteta”;

S obzirom na stav 12.1 Deklaracije Vijeća za implementaciju mira, koje se sastalo u Madridu 15. i 16. decembra 1998.

godine, kojom je pojašnjeno da navedeno Vijeće smatra da uspostavljanje vladavine prava, u koju svi građani imaju povjerenje, predstavlja preduvjet za dugotrajni mir i samoodrživu ekonomiju koja je u stanju da privuče i zadrži strane i domaće ulagače;

Imajući u vidu član I, stav 7(c) Ustava Bosne i Hercegovine;

Prisjećajući se odredbi Zakona o državljanstvu Bosne i Hercegovine ("Službeni glasnik Bosne i Hercegovine", br. 44/97, 13/99, 41/02, 6/03, 14/03 i 82/05) i naročito čl. 40 do 41a, kojima se predviđa da će biti uspostavljena Državna komisija za reviziju odluka o naturalizaciji stranih državljana i propisuje mandat i sastav te Komisije;

Prisjećajući se takođe Odluke Vijeća ministara Bosne i Hercegovine br. 46/06 od 16. februara 2006. godine ("Službeni glasnik Bosne i Hercegovine", br. 30/06 i 75/06) kojom se osniva navedena Komisija;

S obzirom na kominike Upravnog odbora Vijeća za implementaciju mira donesen u Beču dana 15. marta 2006. godine, prema kojem Odbor pozdravlja osnivanje Komisije za reviziju državljanstava i, imajući na umu njenu kritičnu važnost za plan borbe protiv terorizma, traži izvještaj o aktivnostima Komisije;

Potvrđujući daprema prethodno spomenutom Zakonu o državljanstvu mandat Komisije ističe najkasnije jednu godinu nakon što je uspostavljena;

S posebnim osvrtom na činjenicu da se navedenim Zakonom predviđa produženje mandata Komisije na dodatni period ukoliko tako odluči Parlamentarna skupština Bosne i Hercegovine;

Potvrđujući da je Vijeće ministara Bosne i Hercegovine na svom 131. zasjedanju održanom 18. oktobra 2006. godine usvojilo Izvještaj o radu Državne komisije za reviziju odluka o naturalizaciji stranih državljana za period od 1. marta 2006. godine do 31. avgusta 2006. godine i donijelo zaključke kojima

u cijelosti podržava rad Komisije, navodi da očekuje od Komisije da nastavi svoj rad i pripremi iscrpan izvještaj o oduzetim državljanstvima uključujući i pojedinosti o tome na koji način je sporno državljanstvo stečeno, daje u zadatak relevantnim institucijama da razmatraju zakone koji se odnose na državljanstvo, daje u zadatak Komisiji da proslijedi svoje nalaze Tužilaštvu Bosne i Hercegovine i nalaže svim institucijama da zahtjeve koji dolaze od Komisije smatraju prioritetnim;

Imajući u vidu inicijativu za produženje mandata Državne komisije za reviziju odluka o naturalizaciji stranih državljana na još jednu godinu, upućenu Parlamentarnoj skupštini Bosne i Hercegovine dana 7. februara 2007. godine;

Uzimajući u obzir činjenicu da Parlamentarna skupština Bosne i Hercegovine još uvijek nije u cijelosti konstituirana nakon oktobarskih izbora;

Svjesni da mandat Komisije ističe dana 16. februara 2007. godine i da postoji hitna potreba da se osigura da se sa radom Komisije nastavi;

Uzevši u obzir i razmotrivši sveukupnost prethodno spomenutih pitanja, visoki predstavnik ovim donosi sljedeću:

ODLUKU

kojom se donosi Odluka o produženju mandata Državne komisije za reviziju odluka o naturalizaciji stranih državljana

Odluka kojom se produžuje mandat Državnoj komisiji za reviziju odluka o naturalizaciji stranih državljana, koja se ovdje prilaže kao sastavni dio ove Odluke, objavljuje se na službenoj Internet stranici Ureda visokog predstavnika i stupa na snagu kao Odluka Parlamentarne skupštine Bosne i

Hercegovine u skladu s članom III navedene Odluke, na privremenoj osnovi, sve dok je Parlamentarna skupština Bosne i Hercegovine ne usvoji u istom obliku, bez izmjena i dopuna i bez dodatnih uvjeta.

Sarajevo, 15. februar 2007.

Dr. Christian Schwarz-Schilling
Visoki predstavnik

ODLUKA

O PRODUŽENJU MANDATA DRŽAVNE KOMISIJE ZA REVIZIJU ODLUKA O NATURALIZACIJI STRANIH DRŽAVLJANA

I

Na osnovu odredbe člana 40. stav 4. Zakona o državljanstvu Bosne i Hercegovine ("Službeni glasnik Bosne i Hercegovine", br. 4/97, 13/99, 41/02, 6/03, 14/03 i 82/05; u daljem tekstu: Zakon), ovim se produžuje mandat Državne komisije za reviziju odluka o naturalizaciji stranih državljana, ustanovljen Odlukom Vijeća ministara Bosne i Hercegovine od 16. februara 2006. godine ("Službeni glasnik Bosne i Hercegovine", br. 30/06 i 75/06).

II

Mandat Komisije iz člana I ove Odluke produžuje se na dodatni period od jedne godine i okončava se 16. februara 2008. godine, a može se i dalje produžiti u skladu sa Zakonom.

III

Ova Odluka stupa na snagu danom objavljivanja na službenoj Internet stranici Ureda visokog predstavnika i odmah se objavljuje u Službenom glasniku Bosne i Hercegovine.